

TARIKH: 21/12/23 (Khamis)  
SURAT KHABAR: Berita Harian.  
MUKA SURAT: 8

BH

21 DIS 2023 / Khamis  
m/s - 8

Nasional

8

Nasional

# Menteri arah laksana segera projek perintis Dasar Gaji Progresif

## Langkah bagi membolehkan pekerja dapat gaji lebih bermaruah, wajar

Oleh Ilah Hafiz Aziz  
illahhafiz.abdulaziz@bh.com.my

**Kuala Lumpur:** Menteri Sumber Manusia, Steven Sim mengarahkan kementerian itu melaksanakan segera projek perintis Dasar Gaji Progresif bagi membolehkan pekerja mendapat gaji yang lebih bermaruah dan wajar.

Itu adalah antara tiga keputusan penting pada minggu pertamanya, termasuk merangka Dasar Sumber Manusia Negara.

Beliau berkata, keputusan pertamanya adalah mengarahkan Perbadanan Pembangunan Sumber Manusia Berhad (HRD Corp) untuk tidak meneruskan projek 'Skills Passport' kerana ia sudah tertangguh lebih setahun dan ia juga tidak lagi sesuai untuk dilaksanakan.

Katanya, keputusan keduanya adalah merangka Dasar Sumber Manusia Negara se-

bagai panduan utama dalam usaha memperkukuhkan kebijakan, meningkatkan kemahiran dan meningkatkan keberhasilan pekerja.

"Ia juga bagi mempersiapkan pasaran buruh yang mampu menghadapi cabaran masa hadapan seperti perkembangan teknologi digital, agenda negara menua, ekonomi hijau, ketidakpadanan pekerjaan dan keperluan pekerjaan wajar (*decent work*) selaras dengan kerangka Ekonomi Madani.

"Ketiga, saya sudah mengarahkan kementerian untuk melaksanakan projek perintis Dasar Gaji Progresif dengan kadar segera sebagai usaha membolehkan pekerja memperoleh gaji yang lebih bermaruah dan wajar, berikutan pementakan Kertas Putih Gaji Progresif di Parlimen," katanya dalam kenyataan semalam.

### Lantik pegawai

Dalam perkembangan itu, beliau turut melantik Bendahari Agung Kesatuan Kebangsaan Pekerja-Pekerja Bank Malaysia (NUBE) dan Ahli Majlis Am Kongres Kesatuan Sekerja Malaysia (MTUC), Chee Yeeh Ceeu

sebagai Pegawai Tugas-Tugas Khas, dalam iltizam untuk berdiri bersama pekerja.

"Beliau adalah seorang aktivis gerakan buruh yang mempunyai 15 tahun pengalaman aktif dalam pergerakan kesatuan sekerja. Pelantikan ini membolehkan pembabitian yang lebih rapat kaum pekerja dalam pembuatan dasar di peringkat KSM," katanya.



Steven Sim

Katanya, Timbalannya, Datuk Seri Abdul Rahman Mohamad juga mengadakan sesi jelajah ke setiap jabatan dan agensi bagi memahami fungsi dan peranan kementerian.

"Saya juga merakamkan penghargaan kepada kakitangan kementerian

yang menyambut kehadiran kami dan memberikan taklimat. Bermula dari sini, KSM akan membuat perancangan untuk mengoptimalkan fungsi bagi setiap jabatan dan agensi.

"KSM akan tetap berpegang kepada prinsip integriti, ketelusan dan tata kelola yang baik berpandukan nilai-nilai Madani dalam setiap tindakan yang dibuat demi kebaikan kaum pekerja, rakyat secara amnya dan negara," katanya.